



**Komunikadu Imprensa**  
**30 Setembru 2022**

### **JSMP apresia ho iniciativa Parlamentu Nasionál halo alterasaun ba Lei Organizasaun Judisiária**

Parlamentu Nasionál iha loron 19 Setembru 2022, liuhusi reuniaun plenária baixa ona ba Komisaun A, Parlamentu Nasionál Projetu Lei Nú. 478/V(4a) Primeira alterasaun ba Lei Nú. 25/2021 kona-ba Lei ba Organizasaun Judisiária.

Projetu alterasaun ba lei ne'e ho nia objetivu prinsipál mak atu fixa prazu foun ba nomeasaun komisaun instaladora, hodi prevee indikasaun foun ba membru sira no fixa prazu foun ba serbisu komisaun nian.

“JSMP hanoin katak alterasaun ne'e importante tebes tanba loke tan espasu tempu ne'ebé natoon no adekua ba Komisaun hodi bele hala'o nia serbisu ho rigór no qualidade tuir prosedimentu sira iha prosesu selesaun no rekrutamentu ba juis Supremu Tribunál Justisa (STJ) no juis Tribunál Rekursu (TR) hanesan regula iha Lei Organizasaun Judisiária nian,” dehan Direitora Ezekutiva JSMP, Sra. Ana Paula Marçal.

Provizaun alinea b) parágrafo 2) Artigu 125 K-RDTL prevee katak juis sira STJ nian, alende ida Parlamentu Nasionál mak nomea, sira seluk Konsellu Superiór Majistratura Judisiál (KSMJ) mak nomea. Provizaun parágrafo 1) Artigu 128 prevee mós kona-ba kompeténsia KSMJ hodi nomea juis sira STJ nian. Ida ne'e signifika, kuaze juis sira STJ sei nomea husi KSMJ. Nune'e, JSMP hanoin, sede Komisaun ba selesaun no rekrutamentu juis nian tuir loloos harii iha KSMJ nia okos ka supervizaun, nune'e, bele tulun no fasilita prosesu selesaun no rekrutamentu ne'ebé di'ak. Nune'e, JSMP rekomenda atu bele altera mós provizaun parágrafo 10) Artigu 83 Lei Nú. 25/2021 kona-ba Lei Organizasaun Judisiária ne'ebé prevee katak Komisaun ba selesaun no rekrutamentu juis sira ne'e nia sede iha Parlamentu Nasionál.

Iha parte seluk, JSMP mós hanoin katak importante atu valoriza serbisu, dedikasaun no kontribuisaun juis kareira sira ne'ebé hala'o knaar nu'udar juis TR no mós iha tempu hanesan hala'o knaar mós hanesan juis STJ nian. Juis sira ne'e, JSMP rekomenda atu la nesesariamente partisipa iha prosesu selesaun no rekrutamentu, maibé simu de'it nomeasaun husi KSMJ ba juis STJ nian. Atu bele asegura legalidade iha prosesu ne'e, JSMP rekomenda atu, Parlamentu Nasionál, liuliu Komisaun A bele prevee kedas artigu ida kona-ba prosesu ida ne'e.

Artigu sira ne'ebé mak sofre alterasaun mak Artigu 77 kona-ba instalasaun tribunál judisiál sira iha provizaun parágrafo 1) no 2) ne'ebé antes ne'e prevee nia prazu ba fulan 24 no iha alterasaun, prevee prazu ba fulan 30 bainhira iei ne'e tama iha vigór.



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

Entretantu iha Artigu 83 kona-ba Komisaun ba Rekrutamentu no Selesaun hetan alterasaun iha parágrafo 1) ne'ebé antes ne'e prevee prazu ba lora 45 no iha alterasaun prevee ho prazu máximu fulan 9, iha parágrafo 7) ne'ebé antes ne'e prevee Komisaun bele komunika até final iha semester datoluk no iha alterasaun prevee nia prazu ba fulan 12 no envia relatóriu final ne'ebé antes ne'e prevee ba semester datoluk iha parágrafo 8 prevee ba prazu fulan 12.

Deputadu sira mós propoin parágrafo foun iha Artigu 83 kona-ba Komisaun sei sesa nia mandatu bainhira liu tiha lora 30 hafoin entrega relatóriu final hanesan prevee iha parágrafo 13) iha ezbosu lei ne'e.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)

Rua Beco Lakateu, Aldeia Manufiuk,  
Suku Colmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735  
[www.jsmp.tl](http://www.jsmp.tl)

Email: [ana@jsmp.tl](mailto:ana@jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl